

Per trutgs e pitgognas dals 01-04-2011

Proposta dad Adalbert Caminada

„Regitzerspitz“ 1135 msm

Quai è in piz che bunamain nagin enconuscha, ma tut ils Grischuns han gia vis! Tgi che va da Cuira encunter Sargans cun tren u cun auto guarda da maun dretg vi e vesa sin il grip sur Fläsch ina pitga d'auto tensiun che stat tut tort orasum il grip. Ins ha il sentiment che quella pitga stoppia mintga mument crudar dal grip giu. Il punct il pli aut da quai territori, è pia il Regitzerspitz.

Partenza a Fläsch sin 530 msm, il vitg situà il pli en il nord dal chantun Grischun. Fläsch cuntansch'ins cun auto da posta u cun auto privat. Igl dat plirs parcadis, situads a l'ur dal vitg, nua che sa chattan era tavlas d'infurmaziun. Suandar ils mussavias encunter Schnielskopf – Vord. Ochsenberg – Regitzerspitz 1135 msm. Ina interessanta varianta, per part fitg stippa. La vista da Regitzerspitz anora è magnifica. La Val dal Rain tranter Cuira e St. Margrethen ed ils culms Calanda, Gonzen ed Alvier è ina culissa fantastica. La gronda piazza per far pausa è segirada cun in mir da crap. Tgi che na ha betg problems cun il sturnizi guarda sur il grip giu, ca. 600 m en la profunditad. Al pe da la paraid crap vesa ins las bain cultivadas vignas da Fläsch.

Enavos la medema via ca. 3 uras.

Varianta

Suandar la senda encunter Mattheid – Neuwald – Fläsch.

Durada totala ca. 4 ½ uras.

Differenza d'atezza: si e giu ca. 600 m.

Quella tura po ins far bunamain l'entir onn, pia era l'enviern, sche quel na ha betg memia blera naiv. Ev. partenza l'enviern da St. Luzisteig.